

FILIMON

Mi iya Pol siya mii biyie om Rom hir miriyyin mi ta yokwowa siya ha winkikin siir nomiiyauwin yipikin Failimon dapiyin siiramin. Failimon siya om Kolosi hir nwokin. Mi iikamim naingwo tibmiiyim sima Adi Komii siir inig iiririn iripa Failimon siir omaka aiir haingiriyu hainankim. Mi Failimon siya umir digworaekwoki naokingugunankai inkamkin. Mi Failimon siir dimin whirin siir miyan inkam nwir ieya tauachainamin mi siya kimidiniya om Roma hiriir yidamki. Mi siya Pol siirin om Rom hir nini kigiwin mi siir mhii kwoinim ina kisina haigikiyin mi siya ini naingwo tibmiiyan inkama ywowin. Mi Pol siya Onisimas siir boinki siya Failimon siiram swoki amim mi ta yokwowa siya winkiya siya minam winkikin Failimon siiramin siya siir swoki ikunam mi siir dimin bibiyie imiir haiyoprimdiyumiigiyim. Mi siya ha windigiyin mi ta yokwo aiirin kimidiniya Onisimas siya hainam mi siya ini Failimon siiramar swoki amin. Iriig.

¹Kara Polkin. Dimusi rani, kara Jisis Kraisi saika miriigin mi kariirin hiriinansi hiugripkiikikaigin maeyaua mii biyie miriyya sairin. Kara mi iikamim naingwo tibmiiyim krimiir tiran piuganan inkamin Timoti, krira ta yokwowa Filimon kiriiram winkikin, ta yokwowa krira winkiya yipiki inkamin krira naingwokwonanaeyin mi Adi Komii siir mii aiirin krira miriyyin krira kiriiram hauugikin. ²Mi krimiir yokmana yipika krimiir piugana naingwo tibmiiya Apia saeya mi Akipas siya yipiki sau krira ninitiyin dimin taemin bibiyeyim simaka mi yipiki iikamim naingwo tibmiiyim krimiir omaka hir haingiriyu hainaniyim Adi Komii siir inig iir, ta yokwo kara kimiiram warar winkika.

³Kara Adi Komii krimiir Wanin siya mi krimiir Biyyan Inkam Komiiyin Jisis soweram sriigin sower naingwobumbuwa kimiir hauugiyim mi ta hiriinan sairsiyin kima wi kwoin nongwomamair aekak niki owim.

Filimon siir kwoinin Adi Komii siiramar naingwokwonanaeikin

⁴Hinokiinok kara Adi Komii siiram sriiyyim kara kimiirar boin wadieikin. ⁵Dimusi rani, kara ha wakaekin kima ini krimiir Biyyan Inkam Komii Jisis siir yayiar wakaeyokna apim mi ti hiriinan siyyuin iikam nhirmiyam naingwokwonanaeyin iikamim Adi Komii siiram naingwo tibmiiyim simiirin ini kimar nisisiimauuim. ⁶Kara Adi Komii

siiram kwisboinikin kiriir whinkinsiis haiginiuim mi iki iikam nhirim simiir boinmimauiim kiriir naingwo tibmiiya Jisis Kraiis siiram naingwo tibmiiya. Kira simiirin ti hiniina boinmauu mi kiriir yaiya simiir kwoinim wi saeya kisisop haiginiuwi sima ninokninkinim Adi Komii siir siyiupai siyiupaiyim krimiir nokboinmamair haiginiuwiyim. Dimusi rani, krime Jisis Kraiis siirgim. ⁷Ti kariir nomiiyau miyikim, kara ha wakaekim kima Adi Komii siir iikam imiiramar naingwokwonanaekim mi simiirar kigriraowikim mi simiir kwoin imiirar whinkinsiis haiginiuwigim kirie nwowim. Mi sima ini wadieya swoki sibgu owim. Dimusi rani, kariir kwoinin ta yaiya saeya nwowaiginiugin wadie mi kara tisi maigimaarga nwowin. ⁸Dimusi rani, ta kirieya Jisis Kraiis siya hauugiya kariir kara panao pi digar nwowi kiriir boinmauiim ta mii aiir miriiyam. ⁹Mi dimusi rani, krime irni nwirnyam naingwokwonanaei, kara Filimon kiriir iikam imiir kigriraoni haniinaka kara kiriirin tisi hindara sriigiyin ta mii aiir miriiyim. Ihi, kara Polkin, kara bidi ywowin, ti inkamin yipikin maeyaua mii biyie miriia hyuyokiyokaiya saiir nwokaaiyin Jisis Kraiis siir mii aiirsi. ¹⁰Kara Filimon kiriirin Onisimas siiram sriigi. Mi iia kara maeyaua mii biyie miriia hyuyokiyokaiya saiir hirar niki okaiyin mi siya bidi wakaeyim yayim kara boinim Jisis Kraiis siirim mi siya ina yaingwo tibmiiyin. Mi ta hiriinanin Adi Komii siir piugan airin siya ini kariir yinisimnan ywowin. ¹¹Mi ta saiir biyarin Onisimas siya tirim siyiuim yim kiriir kwoin iir bi wokmai haiginiugin, yim ini biyiekibiyie ywowim. Mi ti siyiuim tariinan siya tirim yim wadiekiwadieki kririirin wi simar whinkinsiis haiginiuwi.

¹²Mi tariinanin siirin kara kimiiram swoki ikropki. Kara siiram naingwokwonanaei mi ta hiriinan saiirsika iia siya kimiiram waraur niti kariir mhii kwoinim wi hikakar nwoki. Dimusi rani, siya kariir haiburgikin. ¹³Kara hiniina naingwokin siya kanaka tirar nwokin mi kariirin siyar whinkinsiis haiginiugin iia maeyaua hyuyokiyokaiya mii biyie miriia saiir hir nwokaaiyin Adi Komii siir Yai Win Kibi aiirsi. ¹⁴Mi kima wi wadie nwo karamae nwowi mi ankara iriipi hiriinan pi siir mi onkworinukripkai rani mi ta hiriinana siya kariir whinkinsiisam. Mi kara ha naingwowi miyim kimiir kwoinki naingwowim wi simiirar mirii. Mi ta hiriinan saiirsika kara pi boriisopi kimiir boinanaeyim kima siyiu miyik kariir tiram.

¹⁵Mi tari Adi Komii siyar kiwakikin Onisimas siirin kimaka waraur nwowim. Mi tariinan siya iinokiinokin wi kimaka waraurar nwoyokiyokiikaeyami. ¹⁶Mi tariinanarin siya wi kiriir whisarii mii priimiriyan inkam nwo rani. Mi ini wadie mi owin, siya wi kimiir naingwo tibmiiyan inkam nwowi yipiki kima naingwokwonanaeyin mi kara iriipa hiriinan siya wi kariir piuganan naingwo tibmiiyan inkam nwowi yipiki kara naingwokwonanaeyin. Mi kima siiram in wi nhami

nhami naingwonanae rani. Dimusi rani, ni kira whisarii mii priimiriiyan inkamkin mi iriipi hiriinan ni kira naingwo tibmii piugana saiir inkam warairgin.

¹⁷Mi kiriir kwoinin siya hiniina naingwowi, kara ini kinaka yamasuin, o ini Adi Komii siir piugan anaka yamasuin, yio ini kira kariir kigninkinwiniyin mi siir mi kigninkinwiniya saiir hiriinan ywowin. ¹⁸Mi siya dimin whir kiriir bidi tirbuwin mi kiriir dimin priihaii mi kariir boinmauu, kara nwoki sibgu tirim. ¹⁹Kara Polkin, kariir iinga nonkwo winkim ti nimbinim kimiiram mi Onisimas siya dimin biyie whir kimiir tiri, mi siya dimin whir kimiir warauranki priihaii mi ti diminin wi kara sibgu tiri kimaka mi Filimon kira ina sibgu inokninkinim, karar tirhaiginiugikin kira Jisis Krais siirim asi naingwo tibmii. Mi hiriinanki niuwi, kima kanaka dimin priihaigakim. ²⁰Ihi, ti kariir piuganan naingwo tibmii inkamin, ti siir daingwoki mi kara ha naingwowi kira ti diminin siirin naingwo tibmiini siyiuin siir hauukiiyi kira ti siyiuin kamim naingwo tibmiiyim sima tiriyim kariir kwoin iir sibgu owaiginiuwam mi ta hiriinan saiirsika kara wa maigimaigaei mi Onisimas siirin wi kiriiram waraurar swoki ikropki.

²¹Mi tariinanin kara ta yaiya kiriiram winkika, kara ina ninokninkinin kira wa diriraerar kiini. Mi ti dimin hiriinanin sima sima rani mi iriipi hiriinan iki dimin nhirim kira tirim. ²²Mi diminin whir. Kira maeyaua kwira hiuyokiyokaikwokin omakanau hirin. Dimusi rani, kara ha naingwowi diminim kima sriiiyim Adi Komii krimiir Wanin siirim kariirim mi iia siya siyiu whir kariirim kigninkinki mi kara wa niti mi hiriinan saiirsika kara ha naingwowi siya kariir whindiriraerari, kara kiriir kignakiyim. Iriig.

Boin maigimaigra nhirkim

²³Epafrasin yipiki kanaka ninkin owin mi sima siirin maeyaua mii biyie miriia hiuyokiyokaiya saiir hir hiukripiikiikaigin. Krais siir mii aiirsi mi siya kimiir boin maigimaigakikin. ²⁴Mak, Aristakas, Dimas, mi Luk, ti sima kanaka miriiyim Jisis Krais siirim mi iriipi hiriinan sima kimiirar mi boin maigimaigakikim.

²⁵Kara krimiir Biian Inkam Komii Jisis Krais siirim sriigi siya wi siir naingwobumbuwa wi whiekak kimiirar nwoki hauugiyim. Iriig.